

Headline **Penularan HIV/AIDS dibimbangi**
Date **12 Dec 2010**
MediaTitle **Mingguan Malaysia**
Section **Dlm Negeri**
Journalist **N/A**
Frequency **Daily**
Circ / Read **459,793 / 1,854,000**

Language **Malay**
Page No **L-19**
Article Size **109 cm²**
Color **Black/white**
ADValue **1,585**
PRValue **4,756**



Penularan HIV/AIDS dibimbangi

KOTA KINABALU 11 Dis. – Penularan HIV/AIDS di negara ini berada ditahap membimbangkan dengan purata lapan jangkitan virus itu direkodkan sehari.

Timbalan Menteri Pembangunan Wanita, Keluarga dan Masyarakat, Senator Heng Seai Kie berkata, sebanyak tiga kematian pula direkodkan setiap hari akibat penyakit itu.

“Berdasarkan perangkaan Kementerian Kesihatan penularan gejala HIV/AIDS di Malaysia berada pada tahap membimbangkan di mana sehingga 2009, sebanyak 87,710 kes HIV positif telah dikesan dan 12,039 pengidap AIDS telah meninggal dunia.

“Lebih 40 peratus daripada mereka yang dijangkiti HIV pula adalah terdiri daripada golongan muda berumur di bawah 29 tahun,” katanya.

Beliau berkata demikian ketika berucap pada majlis perasmian seminar pendidikan HIV/AIDS di kalangan remaja di sini, hari ini.

Turut hadir Timbalan Ketua Pengarah (Dasar) Lembaga Penduduk dan Pembangunan Keluarga Negara (LPPKN) Dr. A. P Doshi dan Pengarah LPPKN negeri, Abd. Halil Omar.

Menurutnya punca utama jangkitan HIV amat berkait rapat dengan cara hidup iaitu akibat hubungan seks bebas dan perkongsian jarum suntikan.

Tambahnya masalah gejala sosial akibat keruntuhan akhlak di kalangan remaja menjadi antara punca utama kepada penularan HIV di kalangan remaja.

“Hasil kajian mendapati semakin ramai remaja lelaki dan perempuan terlibat secara aktif dalam hubungan seksual di mana 2.2 peratus remaja pernah mengadakan hubungan seksual,” katanya.

Dalam pada itu Seai Kie berkata, hasil kajian LPPKN juga mendapati golongan remaja masih kurang mempunyai maklumat mengenai seks dan penyakit jangkitan seksual termasuk HIV/AIDS.

“Hasil kajian mendapati hampir separuh golongan berumur 13 hingga 24 tidak mengetahui lebih dari satu kaedah perancang keluarga dan lebih dua pertiga pula tidak mengetahui penyakit jangkitan seksual yang lain selain daripada HIV/AIDS,” ujarnya.